

UMP, universiti di Jerman sepakat

Kerjasama bolehkan pelajar bergraduan dengan dua ijazah serentak

Oleh **Dokhmanad Steffir**
Aswadi Ahmad Kamal
bhpendidikan@bh.com.my

Kuantan: Universiti Malaysia Pahang (UMP) akan meneruskan jaringan kerjasamanya di Jerman menerusi program dual ijazah dengan kerjasama Mannheim University of Applied Sciences (HsMA), bermula 2023.

Sebelum ini, UMP sudah pun menjalinkan kerjasama dengan Karlsruhe University of Applied Sciences (HKA) pada 2010 menerusi program Sarjana Muda Kejuruteraan Mekanik (Kepujian).



Dekan Fakulti Kejuruteraan Elektrik dan Elektronik, Prof Madya Dr Hamdan Daniyal (kiri) ketika menandatangani MoU dengan Presiden HKA, Dr Ing Frank Artinger (kanan) sambil disaksikan Abdul Aziz (duduk, kiri), baru-baru ini.

Pengerusi Lembaga Pengarah UMP, Tan Sri Dr Abdul Aziz Abdul Rahman, berkata menerusi kerjasama terbaharu itu UMP dan HsMA bersetuju untuk menawarkan program kejuruteraan perniagaan yang akan dimulakan pada kemasukan akan datang.

"Menerusi program ini, pelajar akan menerima dua ijazah apabila tamat pengajian nanti iaitu Sarjana Muda Perniagaan Kejuruteraan dari Fakulti Pengurusan Industri UMP dan Sarjana Muda Kejuruteraan dan Pengurusan Antarabangsa dari HsMA," katanya.

Sebelum ini menerusi kerjasama dengan HKA, UMP menawarkan tiga program iaitu, Sarjana Muda Kejuruteraan Mekanik (kepujian); Sarjana Muda Kejuruteraan Automotif (kepujian) dan Sarjana Muda Kejuruteraan Elektrikal (Elektronik) dengan kepujian.

Program bertukaran pelajar

Berdasarkan pengalaman kerjasama sebelum ini, pelajar akan menuntut sepenuhnya di UMP, namun berpeluang mengikuti program pertukaran pelajar berkredit selama satu semester di HKA dengan syarat tertentu.

Sehingga kini, seramai 400 pelajar sudah menuntut dalam program Sarjana Muda Kejuruteraan Mekanik (kepujian); Sarjana Muda Kejuruteraan Automotif (kepujian), manakala bagi program Sarjana Muda Kejuruteraan Elektrikal (Elektronik) dengan pujian ambilan pertama hanya dimulakan tahun ini.

Abdul Aziz berkata, program dual ijazah memberi kelebihan kepada pelajar apabila mereka mampu memperoleh dua ijazah serentak dari dua universiti sahaja.

"Pelajar juga tidak perlu belajar di Jerman bagi memperoleh ijazah dari rakan kerjasama iaitu HKA," katanya.